

Ke Neuna ne Surat Ni Pablo Riyà te Ki Timoteo

1 ¹ Siaken ini se edsurat ne si Pablo. Senge etew a ne kedserihan ni Hisu Kristu igenat dut te suhù te Eleteala ne ebpeleyu keytew wey si Hisu Kristu ke ebpenerengen tew.

² Ne edsuratan ku sikew, Timoteo, ne iring en te tuney ne anak ku egenat dut te kebperetiyyaya nu ki Hisu Kristu.

Iyan ku kiyug ne egkeheram nu ke tavang wey kegkeyru te Eleteala ne Amey tew wey si Hisu Kristu ke Kerenan tew, ne egenat kandan ne ebmerinew ke itungan nu.

Ke Menge Etew Ne Ebpenurù Te Kenà Benar Ne Med-engked

³ Kenà nu lipati, Timoteo, ke migkahi ku keykew te ked-awà ku en te ebpendiyà te Mesidunya. Migkahi a te med-ubpà ka pà diyà te inged ne Ipisu su ruen menge etew ne ebpemenerù te kenà benar, ne peengkera nu sikandan.

⁴ Ikahi nu kandan se med-engked dan se ebpenurù dut te menge guhud ne mibèbeelan dà te menge apù dan wey ke layab ne guhud te kepuunpuun te apù dan. Su ini se kebpenareng dan dut te warà tapek din ne ebpekevaal dà te kebpelewlewaney, ne kenà dan egketuen ke tidtu ne ibayà ne kayi ran dà egketuen te kedsarig dan te Eleteala. ⁵ Iyan ku idsuhù ini su apey ran ebpelelimimuey. Ini se kebpelelimimuey ne egenat te hinawa ran ne midtilak te Eleteala su apey warà ebpekesawug ne meraat te itungan dan wey kenà alang-alang se kedsarig dan ki Hisu Kristu. ⁶ Ugaid ne arà se ebpememandù te kenà benar ne nekesuwey en ketà te tidtu ne ibayà, ne iyan dan en ebpulungan ne ebpelewlewaney te warà rantek din. ⁷ Egkesuat dan ne ebpememandù te penduan ne impesurat ki Moises dengan, ugaid ne warà dan ma mesebuti ke engkey se meana rin ini se penduan ne idtehel dan ibpenurù te menge etew.

⁸ Netuenan ta ne meupiya ini se penduan ke embiya iyan ta kedumai ne ke enget dà ne atag din. ⁹ Ne netuenan ta rema se kenà iyan din

egkesuhat te penduan ne ke minge etew ne metidtu, ugaid ne iyan din egkesuhat ke minge etew ne edsumbaker te penduan wey ke minge etew ne ed-engkenà te lalag te Eleteala, ke minge etew ne warà te itungan dan se Eleteala wey ke mekesesalà, ke minge etew ne meraat se itungan dan wey ke minge etew ne edsumpalit te Eleteala, ke minge etew ne eburnù te amey ran wey iney ran wey ruma ne minge etew ne teremunù. ¹⁰⁻¹¹ Benar ne iyan din imbe egkesuhat ini se penduan ne minge etew ne mesalàsala, minge meama ne ebpeunturey ke elin meama wey ke ebpeunturey ke elin meritan, minge etew ne ebpenggebpà su ebpesaan, minge etew ne teruen wey ke minge etew ne ebpetitihus te tarù, wey misan engkey en ne meraat ne ulaula ne ebpekesuway rut te tidtu ne penduan te Eleteala. Iring be imbe kayi ne minge etew se egkesuhat kayi te penduan su kenà dan eduma kayi te tidtu ne penurù. Ini se tidtu ne penurù ne kayi te Meupiya ne Tudtul ne ebpesabut keyta mekeatag te Eleteala ne dait ne edeyuen, ne insarig din kedì te ibpemenudtul ini riyà te minge etew.

Ke Kebpeselamat Ni Pablo Rut Te Eleteala

¹² Ebpeselemetan ku si Hisu Kristu ke Kerenan tew ne layun ebehey kedì te keeg kayi te gelevek ku. Uya, ebpeselemetan ku kandin su edserihan a rin, ne midtendù a rin ne egelevek kandin. ¹³ Misan engketà te rengan ne meraat se lalag ku mekeatag kandin, ne mibpemekeiran ku ke minge etew ne mibperetiyaya kandin, ne midtekudi ku sikandin, ugaid ne neyruwan a te Eleteala su warà e pà mekesabut te meraat ke ulaula ku su warà e pà mebperetiyaya ki Hisu Kristu. ¹⁴ Melimù nevenar si Hisu Kristu ke Kerenan tew su mid-uluhan a rin te raat te nanam, ne pinesarig a rin kandin, ne midtehuan a rin te kegelimù ku kayi te minge ruma ku egenat dut te kinepekidseveka ku kandin.

¹⁵ Benar iya ini ne egkehiyen mekeatag te iyan impengkayi ni Hisu Kristu te ampew te dunya, ne dait ini ne ebperetiyayaan te langun. Su iyan din impengkayi apey ibpeliyu rin ke minge etew dut te kedusa te salà dan. Ne siaken en iyan se nekeunauna ne belisalà. ¹⁶ Misan engketà te siaken en iya se nekeunauna ne belisalà, ne ingkeyru a te Eleteala su apey siaken se igkepekita ni Hisu Kristu te metmetigker sikandin dut te minge etew ne belisalà. Apey ruen ebpekeledawan dut te merakel ne etew te warà etew ne belisalà ne kenà egkepesahad ni Hisu Kristu, ne ketà ne sikandan ke upama ebperetiyaya ran ne ebpekehaked te umur ne warà edtemanin din. ¹⁷ Ne edeyrey kiyu ve te Eleteala taman te taman su sikandin dà se Eleteala. Ne sikandin se ebayàbayà te langun taman te warà ketepusan din. Kenà sikandin egkekita su rengan ne daan en sikandin su warà rudsuan din ne warà kemetayen din.

¹⁸ Na sikew, Timoteo ne iring te anak ku, ini se igkahi ku kenikew. Tentenuri nu ke ingkahi rut te ebpelambas te lalag te Eleteala rengan

mekeatag dut te helevek nu. Tentenuri nu ve apey ebmetihel ke hinawa nu te edtuman dut te insuhù keykew su apey ka ebpenehana te ed-aturut te meraat. ¹⁹Kemali nu te mevaher ke sarig nu ki Hisus, ne kenà ka ulaula te meraat su apey kenà ka egkeyeyaan diyà te etuvangan te Eleteala wey diyà te etuvangan te menge etew. Su ruen menge etew ne misan netuenan dan ded se meraat ke ulaula ran ne ed-iseg den pà lavew, ne ini ve se sarig dan ne warà en misan daan en ne mibperetiyaya ran. ²⁰Iyan iring kayi ne en si Himinyu wey si Alejandro. Midlekaan ku sikandan su apey egkeyevveyai en ni Setanas ke datù te pekaid apey ran metueni te kenà iya egkepakey ne edsumpeliten se Eleteala.

Ke Menge Suhù Mekeatag Te Ebpengevrungan Te Ebpengarap

2 ¹Iyan ku id-una igkahi keykew ne layun kiyu ebpengeningeni te Eleteala ke langun ne etew piya engkey en sikandan. Ebpemuyuen tew te Eleteala te behayi sikandan te langun ne kurang dan, ne kenà ki edlipat te ebpeselamat te Eleteala dut te tavang din. ²Ibpengeningeni tew te Eleteala ke menge mepurù ne ebayàbayà kenitew wey langun ne menge ruma ran ne ruen gaga ran te ed-ewit kenitew. Ibpengeningeni tew te Eleteala sikandan apey meupiya se ked-ewit dan keytew su apey ebmelinandang se ketemanan tew wey apey ruen kesig tew te eduma te Eleteala wey ed-ulaula te metidtu. ³Iring imbe kayi ne pengeningeni se meupiya ne igkesuat dut te Eleteala ne ebpeleyu keytew rut te salà tew. ⁴Su iyan din igkesuat ne langun te menge etew ne ebpeketuen te tidtu ne ralan diyà te Eleteala wey ebpekeliyu ran dut te kedusa te salà dan. ⁵Su Eleteala ne sebseveka rà, ne sebseveka rà dema se edteyekupan tew te menge etew riyà te etuvangan te Eleteala ne warà liyu rin ke kenà si Hisu Kristu ne nevaluy ne etew. ⁶Iyan din mid-ulaula te kinepengkayi rin te ampew te dunya ne imbeliwas din ke umur din te kebpeleyu rin te langun tew rut te kedusa te salà tew. Mid-ulaula rin ini dut te enget en ne hewii ne midtendù te Eleteala rengan su tuus be ini te kiyug te Eleteala ne langun ne menge etew ne ebpekeliyu. ⁷Tembù be mibpemili a ni Hisu Kristu ne kedserihan din ne ibpemenudtul ini se tidtu ne lalag mekeatag kandin diyà te menge etew ne kenà Hudiyanen apey ran ebpekeperetiyaya. Ini ve iya se egkehiyen ku ne kenè en be iya ini egkedtarù su benar!

⁸Ne duen pà ebuyuen ku keniyu. Iyan ku kiyug ne piya endei en egkevurun ke menge etew ne mibperetiyaya ki Hisus, ne ke menge meama se ebpenheewit keniyu te ebpengeningeni. Ugaid ne id-awà den pà neraan ke epes dan te ruma ran wey ke kebpelelewewaney ran apey iyan dan ibpeuna te hinawa ran ne ke Eleteala.

⁹Ne engketà ded dema ke menge meritan, duen erangan te kebpedait dan te kebevelegkas dan. Kenà kayi rà te mepurù ne

velegkas dan etawa kayi te kebpuutus dan etawa menge rayandayan ne bulawan egketueni se keupiya ran te menge meritan. ¹⁰ Ugaid ne kayi egketueni te meupiya ne ulaula ran. Su arà se dait dut te menge meritan ne egkekahi ne mibperetiya te Eleteala.

¹¹⁻¹² Ne kenà ku idluhut ne iyan ebpenurù se meritan dut te menge meama diyà te kevrunan niyu etawa ebpenheewit kandan. Iyan meupiya ne mebpeeng-eneng ke meritan se ebpeming dut te ebpenurù kandan su apey ran ebpekehuru. Iyan dà kandan ne mebpeeneng-eneng. ¹³ Su iyan neuna ne midlimbag te Eleteala ne si Adan ne arà pà ne si Eva. ¹⁴ Ne kenà si Adan se nelimbungan ni Setanas ke datù te pekaid su ke esawa rin ne si Eva, ne ketà puunan ne nekedsalà sikandin. ¹⁵ Tembù be egkerasey ke meritan ke ed-anak, ugaid ne egketevangan dan te Eleteala su apey ran ebpekeliyu embiya egkamal dan te mevaher te peretiya ran kandin wey ebpeklimuey ran wey ebpeketidtu ran te ulaula ran ne ebpekesuhat te Eleteala.

Ini Ne Mekeatag Te Betasan Dut Te Menge Unuten Te Menge Mibperetiya

3 ¹ Benar iya ini se beseanan ne egkahi te, “Embiya ruen etew ne egkiyug ne ebpenheewit te menge etew ne mibperetiya ki Hisus, ne meupiya nevenar arà se helevek ne egkiyuhan din.” ² Ugaid ne ke etew ne ebpenheewit te menge mibperetiya ki Hisus ne iyan din kemeyidan ne warà ulaula rin ne meraat ne igkesawey kandin, ne seveka rà se esawa rin. Iyan din kemeyidan ne kenà mekalas se kebpennunen din te keuyahan, ugaid ne erangan se ed-ul-ulaan din su apey langun ne ulaula rin ne meupiya. Iyan din kemeyidan ne mesakew te piya engkey en ne etew, ne metau sikandin ne ebpenurù. ³ Kenà sikandin metehel ne ed-inum te ebpeketevereg. Ne kenà sikandin edretem te meraat dut te menge ruma rin wey kenà lelengeten, ugaid ne metigker wey metulanged, ne kenà lelegawen te pirak. ⁴ Iyan din kemeyidan ne egkeveyveyaan din ke sikandan ne telteleanak, wey ke menge anak din ne meperumaruma su meadat kandin. ⁵ Su embiya kenà din egkegaga te ebpenheewit ke kandin ne menge anak, ne iyan din pè be megaga te ebpenheewit se merakel ne etew ne mibperetiya ki Hisus. ⁶ Kenà dema egkepakey ke behu pà sikandin ne mibperetiya ki Hisus su kema ke ibpereyùdeyù din ke ketengdanen din, ne ketà ne edusaan sikandin te Eleteala iring te kinedusai te Eleteala ki Setanas. ⁷ Ne iyan din kemeyidan ne ini se etew ne ebpenheewit te menge etew ne mibperetiya ki Hisus ne egkeedatan dut te menge etew ne warà pà mebperetiya ki Hisus. Su embiya ruen meraat ne ulaula rin, ne edsewayan sikandin su arà ke idselaid ni Setanas kandin.

Ini Ne Mekeatag Te Betasan Dut Te Edsukendul Te Menge Unuten

⁸ Iring ded be kayi rema ke menge etew ne edsukendul dut te menge unuten, iyan din kemeyidan ne ebpegedatan rema ini ne menge etew wey

ebpengeserihan se lalag dan. Kenà dan metehel ne ed-inum te ebpeketevereg, ne kenà dan lelegawen te kearen. ⁹Ey-eyari ran te egawed ke kebperetiyaya ran dut te penurù ne impayag te Eleteala mekeatag ki Hisus, ne kenà eduwaruwa se hinawa ran dut te kebperetiyaya ran su netuenan dan ne warà idselipsis dan ne meraat kayi te kebperetiyaya ran. ¹⁰Embiya ruen etew ne egkiyug ne edsukendul dut te minge unuten, ne egkeintengan pà se ulaula rin. Ne embiyà warà meraat ne ulaula rin, ne arà pà ne ebpekesukendul sikandin dut te helevek.

¹¹Engketà ded ke minge esawa ran, iyan din kemeyidan ne ed-ulaula ran te meupiya su apey ran egkeedati, ne kenà dan serupeten. Ne kenà dema mekalas se kebpenunuen din te keuyahan. Ne ebpengeserihan te piya engkey en ne ed-ul-ulaan dan.

¹²Ini se minge etew ne edsukendul ne seveka rà se esawa rin, ne egkevayvayaan din ke sikandan ne telteleanak wey langun ne ed-ubpà te valey. ¹³Su embiya meupiya se helevek kayi te minge etew ini ne edsekundul, ne kenà egketuen te wagib se kenà ed-edatan dut te minge etew ne ketà dema ne kenà egkealang-alang sikandan ne ebpesabut te ruma mekeatag te kebperetiyaya ran ki Hisu Kristu.

Ke Rekelà Ne Penurù Te Eleteala Mekeatag Ki Hisus Ne Warà Din Impayag Dengan Ugaid Ne Guntaani Ne Impayag Din En

¹⁴Kiyug ku ne kenà meuhet ne ebpekelambas a kenian te keniyu, Timoteo. Ugaid ne iyan ku kedsurat kenikew ¹⁵ne kema ke mevangen a, ne ini ve se surat ku ne ebpekepenurù keykew ke engkey se meupiya ne ed-ul-ulaan tew te sikitew ne mibperetiyaya te Eleteala ne warà kemetayan din, su anak kiyu en nikandin. Su langun tew ne mibperetiyaya te Eleteala ne iring ki te baley te Eleteala ne ed-ubpaan din. Ne iring ki red te pelaus dut te baley rin su sikitew se edtindeg dut te benar ne penurù din. ¹⁶Netuenan tew langun ne ke kerekelà te penurù te Eleteala ne impayag din keyta ne mibperetiyaya rey en. Egkahi te,

Nevaluy si Hisu Kristu ne etew
ne mid-ubpà kayi te ampew te dunya,
ne ke Kedesenan ne Ebpetuntul te Menusiyà,
se iyan midtitihus te tuney sikandin ne Anak te Eleteala,
ne nekita sikandin te suluhuen te Eleteala.
Ne impemenudtul sikandin
diyà te langun ne minge etew kayi te ampew te dunya,
ne merakel se nekeperetiyaya kandin
ini te lusud te dunya,
ne mibpeliendud si Hisus diyà te Amey rin diyà te langit.

Mibaag Si Pablo Ki Timoteo Mekeatag Te Minge Etew Ne Ebpetuntul Te Tarù Ne Ebpekelimbung Te Minge Etew

4 ¹Na Timoteo, mepayag nevenar ke migkahi dut te Kedesenan ne Ebpetuntul te Menusiyà te ruen minge etew ketà te ketepusan ne

hewii ne edsuwey rut te kebperetiyaya ran ki Hisu Kristu. Su iyan dan en maa edumaan ke busew ne metau ne edlimbung, ne ebperetiyaya ran te tarù ne ibpepenurù te menge vusew. ²Ne ruen engkungkun ne metidtu ne menge etew ne ebpenurù dut te tarù ne lalag te menge busew. Ne ini se ebpememandù te meraat, ne warà en te itungan dan se meraat ini su nelayaman dan en wey iyan en ma ebayàbayà te itungan dan ne si Setanas ke datù te pekaid. ³Ini se ebpememandù te tarù, ne edawey ran te ebpees-eseweey wey ruen egkekaan ne ibpemandù dan te kenà ibpekaan. Ugaid ne ini se egkekaan ne mibpengaren te Eleteala ne egkeenen tew, labi pà ke sikitew ne mibperetiyaya kandin wey nekesabut dut te tidtu ne penurù asal id-una tew pà te ebpengeningeni ne ibpeselamat te Eleteala se egkeenen. ⁴Su langun taman ne mibpengaren te Eleteala ne meupiya. Warà kenà egkekaan embiya id-una tew pà ibpengeningeni te kebpenelamat, ⁵su ke egkeenen tew ne pekegkeupiya egenat dut te Lalag te Eleteala wey ke kebpengeningeni tew kandin.

Ke Dait Ne Ed-ul-ulaan Dut Te Menge Etew Ne Egelevak Ki Hisu Kristu

⁶Embiya ibpenurù nu ini se migkahi ku kayi, Timoteo, diyà te menge mibperetiyaya kenyan te keniyu, ne tuus arà te egkeserihan ka ne suhù ni Hisu Kristu ne ebpesabut te lalag din. Ne tuus dema te mid-iseg ke sarig nu su intahù nu te hinawa ke tidtu ne penduan wey midumaan nu te arà arè en. ⁷Kenà ka sehipà te layab ne guhud te kepuun su warà pantag din ne kenà diyà ebpuun te Eleteala. Ugaid ne pegitunga nu te mevaher ke engkey se ulaula ne ebpekesuhat te Eleteala. ⁸Meupiya se kedlumbad ta te lawa ta su apey ki ebmevaher, ugaid ne iyan pà muna ne ibaher tew te itungan tew se keduma tew te Eleteala. Su embiya ini se ed-ul-ulaan tew, ne ruen keupianan te kegkeuyag tew kayi te ampew te dunya wey ruen ded dema ketà te keuhet din ne hewii diyà te langit. ⁹Benar imbe iya ini se migkahi ku ne iyan meupiya ne ebperetiyayaan te langun. ¹⁰Tembù be ebpegelep te egelevak te Eleteala su edsarig ki te Eleteala ne warà kemetayan din ne iyan ebpekepeleyu te langun ne menge etew, labi en ke menge etew ne mibperetiyaya kandin. ¹¹Ini se migkahi ku, Timoteo, ne ini ve se ipenurù nu dut te menge etew ne mibperetiyaya ki Hisus, ne itarem nu kandan se ini se dumai ran.

¹²Na Timoteo, kenà nu idluhut se kedsudian ka misan engkenyan te menguwed ke pà, ugaid ne iledawan nu rut te langun ne menge ruma niyu ne mibperetiyaya. Ipekita nu ke keupiya ne egkeiringan dan kayi te lalag nu wey ke ed-ul-ulaan nu. Pekita ka te limù dut te menge ruma nu wey ke tidtu ne sarig nu te Eleteala, ne ipekita nu kandan te warà meraat ne netahù te itungan nu su apey sikuna se egkeiringan. ¹³Taman te kenà e pà ebpekeuma kenyan te keniyu, ne iyan nu ibpeuna te itungan nu ne ke kebasa te Lalag te Eleteala diyà te egkevurun ne menge mibperetiyaya

ki Hisus. Seysaya nu up-upiani wey ipesabut nu kandan apey ran egkerumai. ¹⁴Ne kenà nu lipati ke ketau nu te ebpeneheewit te minge mibperetiyaya ne imbehey te Eleteala keykew ketà te midampen ka rut te minge pekilukesen te minge mibperetiyaya ne impengeningeni ka rin. Su iyan dan migkahi ke impesabut kandan dut te Ebpelambas te Lalag te Eleteala.

¹⁵Sevekaa nu se itungan nu kayi te migkahi ku keykew, ne dumai nu ini su apey egkekita te langun se ked-iseg din ke keduma nu te kiyug te Eleteala. ¹⁶Urami nu ke ed-ul-ulaan nu wey ke kebpenurù nu. Su embiya edumaan nu ini se migkahi ku, ne kenà sikuna rà se ebpekeliyu rut te kedusa te salà nu su misan imbe rema ke ebpeming keykew ne ebpekeamung.

Ini Ne Mekeatag Te Dait Ne Ed-ul-ulaan Dut Te Minge Ebpeneheewit Te Minge Mibperetiyaya

5 ¹Duen ruma pà ini ne kiyug ku ne rumai nu. Kenà nu rengrengiti ke minge lukes ne meama, ugaid ne neyneyui nu sikandan iring te tuneu ne amey nu. Ne ke minge kenakan, ne penurua nu sikandan iring te minge suled nu. ²Ne ke minge meritan ne lukes pà keykew, ne penurua nu sikandin iring te tuneu ne iney nu. Ne ke minge raha, ne penurua nu sikandan iring te eteveu nu. Ne iyan nu pegitunga kandan se warà misan deisek dà ne meraat ne kayi te itungan nu.

Ke Kebpenurù Mekeatag Te Minge Valu Ne Meritan

³Na Timoteo, tevangi niyu ke minge valu ne meritan ne warà egkespesineruwan dan te kegkeuyag dan. ⁴Ugaid ne embiya ruen anak din etawa apù din ini se valu, ne iyan dan en ebpetugenuren kayi te lukes dan ne tuus te keduma ran te Eleteala wey apey ran ebpekevaras te lukes dan wey apù dan. Su ini se ulaula ne ebpekesuhat te Eleteala.

⁵Ne ini se valu ne meritan ne sebseveka rin su warè en edtuganur kandin, ne Eleteala rà se egkedserihan din ne merukilem meandew ne layun ebpengeningeni sikandin diyà te Eleteala su ebpemuyù te tavang. ⁶Ugaid ne ke balu ne iyan din dà igkesuat ne ke kiyug te kememenusiyai, ne misan biviyag pà sikandin ne iring te minatey en su warà kayi te kandin ke umur ne ibehey te Eleteala ne warà edtemanan din. ⁷Ipenurù nu ve ini se suhù ku mekeatag te minge valu ne meritan diyà te minge etew ne mibperetiyaya te Eleteala su apey warà meraat ne lalag ne ebpekesuhat kandan. ⁸Su ke etew ne kenà edtuganur te minge suled din, labi en ke sikandan ne telteleanak, ne midlekaan din ke kebperetiyaya rin ki Hisu Kristu. Ne tuwas pà lavew sikandin dut te etew ne warà mebperetiyaya.

⁹Ne embiyà idsurat nu ke minge valu ne meritan ne ebpeketavang dut te minge mibperetiyaya, ne iyan nu rà isurat ke minge valu ne

labi enem nepulù se rahun din ne keseveka rà mekesawa. ¹⁰Iyan dà egkepakey ne valu ne ke ed-edatan su meupiya ke helevék din iring be te kinepeneheewit din te meupiya te minge anak din, kinetirapan din te ebpekaan dut te minge etew ne sumeseharey, kinetavang din te minge etew ne mibperetiyaya te Eleteala, labi en ke minge etew ne ebpekeanuyanuy te kerehenan wey misan engkey en ne ketulengeran din ne impekita rin diyà te minge ruma rin.

¹¹Ke minge valu ne meritan ne sesangen pà, ne kenà niyu iamung te edsurat. Su embiya egkeumaan dan te kiyug te kedsaup den pà maa ked-esawa, ne ed-ewaan dan ke helevék dan ki Hisu Kristu. ¹²Ne ketà ne edsewayan sikandan, su warà dan medtuman te pasad dan ne kenà dan ed-esawa edsaup su apey ran egelevék ki Hisu Kristu. ¹³Ketà be ne kenà meupiya embiya ini se egketevangan su kalu ke ebpehulen ne ebpedlakit diyà te idsehumbelayà. Ne kenà arà dà su egkevaluy ran ne serupeten wey ebpedlakit, ne ebpenlalag te kenà dait ne egkelalag dan. ¹⁴Embiya ke kediey rà kayi te minge valu ne sesangen pà, ne medsaup den pà mebpeesawa ne tugenura ran ke sikandan ne telteleanak apey warà meraat ne egkekahi rut te minge etew ne warà mebperetiyaya ne ebpekesuhat kandan. ¹⁵Iyan ku kegkahi su ruen minge valu te misan gunteani en ne midsuwey en se ebperetiyaya ki Hisu Kristu ne si Setanas en ke datù te pekaid se edumaan dan.

¹⁶Tembù be ke ruen mibperetiyaya te Eleteala ne ruen suled din ne valu, ne tugenura rin. Kenà din pegitunga se iyan edtuganur ke langun ne mibperetiyaya, su iyan dan edtugunuren ke minge valu ne warà edtehikur kandan.

Ke Kebpenurù Mekeatag Te Minge Mibpeneheewit Dut Te Minge Mibperetiyaya

¹⁷Duen pà egkehiyen ku, Timoteo, mekeatag te minge etew ne ebpeneheewit te minge mibperetiyaya ki Hisus. Embiya meupiya se kebepeneheewit dan, ne edati niyu sikandan wey edsukayan sikandan te meupiya. Labi en be ke etew ne mibpenamantaman sikandin te kebpenurù din wey kebpesabut din te Lalag te Eleteala. ¹⁸Su ruen impesurat ne Lalag te Eleteala rengan ne egkahi te,

“Kenà nu pungesa ke sapì ne egiek te parey
su apey ebpekekaan.”

Ne ruen pà maa Lalag te Eleteala ne egkahi te,

“Ke etew ne egelevék,
ne dait ne edsukayan.”

¹⁹Embiya duen ebpekesuhat te etew ne ebpeneheewit te minge mibperetiyaya te Eleteala ne meraat ne ulaula, ne kenà niyu pehimbenara ke kenà duen deruwa etawa tetelu ne ebpeketitihus te arà ne ulaula rin.

²⁰Ne embiya benar ne mid-ulaula ini se etew te meraat, ne riyà niyu pengeheti te etuvangan dut te langun ne mibperetiyaya su apey ke ruma ne egkeandek ne ed-iring.

²¹Na Timoteo, pemineha nu up-upiani ini se penduan ku keykew ne tentenuri nu te ke Eleteala, si Hisu Kristu wey ke suluhuen te Eleteala se titihus te kedsuhù ku keykew. Embiya ebpedtuntey ka te deruwa ne etew, ne warà remihi nu kandan ugaid ne tidtuwa nu ke kegkukum nu. ²²Ne embiya ruen edtenduen nu ne ebpepenehewiten nu rut te minge mibperetiyaya, ne kenà ka ed-una edampen kandin taman te kenà nu egkepeniyap se ulaula rin. Su embiya ruen ulaula rin ne meraat ne nerampen nu sikandin, ne ebpekeunung ka te salà din. Tembù be uram ka ke ebpekeamung ka rut te salà.

²³⁻²⁵Su ruen minge etew ne ed-ulaula te meraat ne egkepayahan en, tembù be egketuenan nu ke betasan dan te warà nu pà mekita sikandan. Ne ruen duma ne ed-ulaula te meraat ne kenà egkepayahan taman te meuhet. Iring ded dema te minge etew ne meupiya se ulaula rin ne melemu ne egkepayahan. Ugaid ne misan kenà egkepayahan ke meupiya ne ulaula rin, ne egketuenan ded te meuhet ne hewii. Na ruma pà, Timoteo ne kenà iyan nu rà inuma se wayig su inum ke red te reisek ne binu su ibawì te mesakit ne getek nu wey ke ruma pà ne sakit nu ne layun nu egkeheram.

Ke Kebpenurù Diyà Te Minge Mibperetiyaya Ne Nengeuripen

6 ¹Ini ve ne penduan ku dut te minge etew ne nebpaşa ne neuripen. Misana sugshuen sikandin, embiya mibperetiyaya ki Hisu Kristu ne med-adat sikandin dut te edsuhùsuhù kandin apey warà etew ne ebpekekahi te meraat mekeatag te Eleteala wey ke ibpenurù tew ne riyà ebpuun te kandin. ²Ne embiya ke sugshuen wey ke edsuhùsuhù ne elin mibperetiyaya ki Hisu Kristu, ne kenà dait ne ebpegitungen dut te edsugshuen ne geina te edsuled dan te kebperetiyaya ran ne egkepakey ne egkurangan din ke adat din kandin. Nasì pà se up-upiani rin ke gelevek din dut te edsuhùsuhù kandin wey edati rin su mibperetiyaya en dema te Eleteala ne elin dan igkelimù te Eleteala.

Ke Etew Ne Egelevek Ki Hisu Kristu Ne Kenà Meperateng Te Ke Kewesai Rin

Ini ve imbe, Timoteo, se ibpesabut nu te meupiya kandan su apey ran egkerumai. ³Embiya ve ruen ebpenurù te senge bias su kenà iring kayi te tidtu ne penduan ne impenurù ni Hisu Kristu ke Kerenan tew, ⁴ne meperayù sikandin ne warà nesebutan din mekeatag te tidtu ne penurù. Iyan din dà igkesuat ne ebpekidlewaney te lalag, ugaid ne warà rantek din ini su iyan din dà egketemanan ne ebpein-indihà, kewahaan,

ebpetemtempeleey, peen-entapà ⁵wey ebpeep-epuley ran su ini ke ulaula rut te minge etew ne nereetan en ke itungan dan ne warè en iya meketahù te itungan dan ke tidtu ne penurù ni Hisu Kristu. Su iyan dan kunaan ke kebpsakup dan te Eleteala ne ebpekegwasa kandan.

⁶Ne benar ne sikitew ne mibperetiyaya en te Eleteala ne ruen ke kewesai tew, ugaid ne kenà kearen ini. Su iyan dekelà te hinawa tew ini se kebpsakup tew te Eleteala wey kebmeupiya te hinawa tew ke misan deisek dà ne kearen tew. ⁷Su pehaney en te kinehemew tew kayi te ampew te dunya, ne warà en iya nerimbitrimbit tew misan deisek dà. Ne engketà ded maa ke ebpatay kiyu en, warà en iya deisek dà ne egketapik tew. ⁸Ketà be ne embiya maa duen ded egkekaan tew wey duen belegkas tew, ne edupianen tew en te hinawa tew.

⁹Ugaid ne ke minge etew ne egkesuat ne egkewasa ne merakel se ibpenggeram kandan. Su ini se kegkesuat dan ne warà rantek din ne ebpekekaid kandan ne iring te telebpì kandan ne kenà dan ebpekeliyu. Ne kayi te ini ne egkevinasa ran dut te kedusa ne kenà edtaman. ¹⁰Su ini se kegkenuhun te kureta dut te minge etew, ne ini se puunan te merakel ne meraat ne ulaula ran. Su duen minge etew ne midsuwey se kebpseretiyaya ran te Eleteala su ini imbe iya se kiyug dan te kegkewasa. Ne iyan dan egketemanan se nekevaal te dekdekelà ne kemutuwan dan.

Ke Suhù Ni Pablo Diyà Te Ki Timoteo

¹¹Ugaid ne geina te sikuna ini, Timoteo, ne etew ne eduma te Eleteala, ne uram ka apey kenà ka ebpekeiring kayi te minge etew ini. Penamantaman ka te kebmetidtu te ulaula nu wey itungan ne ebpekesuhat te Eleteala. Ilaus nu ke kedsarig nu te Eleteala. Ikelimù nu ke minge ruma nu, ne misan engkey en kerehen din ne tigkeri nu, ne ipekita nu ke ketulengeran nu kandan. ¹²Misan ebpekeanuyanuy ka te kemerehenan, ne ikehat nu te tivang se keduma nu te Eleteala su apey nu egkehaked arà se umur ne warà edtemanan din. Su arà imbe ke impasad te Eleteala kenikew ketà te kinetawag din keykew ne migkahi ka riyà te etuvangan te merakel se mibperetiyaya ke en.

¹³Na duen pè be maa ini igkahi ku keykew ne ke Eleteala ne mibehey te niyawa te langun ne eginginawa se ebpekevantekeyta wey si Hisu Kristu ke mid-itindeg dut te benar diyà te etuvangan ni Poncio Pilato se ebantey rema. Tembù be igkahi ku keykew ¹⁴ne perumdumai nu ke langun ne insuhù keykew su apey warà meraat ne ebpekesawug te ed-ul-ulaan nu ne egkesewayan ka. Dumai nu ve ini langun taman ketà te kedlived ni Hisu Kristu kayi. ¹⁵Ini ve se kebpelived te Eleteala ki Hisus kayi ne kedtumana rin dut te enget ne hewii ne mibpemilì din. Su sikandin dà se keupianan te ebayàbayà te langun. Sikandin ke mepurù ne ebayàbayà dut te langun ne minge datù wey sikandin ke mepurù

ne ebayàbayà dut te langun ne menge pengulu. ¹⁶Sikandin dà se warà kemetayan din, ne riyà med-ubpà sikandin te ebpeneringsing ne rayag ne kenà egkeuvey te menge etew. Warà etew ne ebpekekita kandin su sikandin ne kenà egkekita. Edeyù kiyu ve kandin su sikandin ke ebayàbayà taman te taman! Egketuman ini.

¹⁷Na Timoteo, kehiyi nu ke menge etew ne kewasa te kenà dan ibpereyùdeyù, ne kenà dan serihi ke kekewesai ran su ini ne edsahad dà. Ugaid ne iyan dan serihi ne Eleteala su ebhayan kiyu nikandin te pengelimuan din ne sesangan apew ki egkehalew. ¹⁸Kehiyi nu ke menge kewasa ne med-ulaula ran te meupiya wey medtavang dan dut te menge ruma ran, su igkesuat te Eleteala ne ebpekeumun ded sikandan dut te imbehey rin kandan. ¹⁹Su embiya ini se ed-ul-ulaan dan, ne iring dut te edtahù dan te kekewesai ran diyà te langit ketà te akir din ne hewii su apew ran ebpeketelimà te umur ne warà edtemanan din.

²⁰Na Timoteo, tugenura nu ke kebpenurù nu ne insarig te Eleteala kenikew. Kenà nu ed-emungi ke menge etew ne ebpengasak te lalag ne kenà ebpekesuhat te Eleteala wey ebpelewlewaney te warà rantek din. Su iyan dan kunaan ne metau ran, ugaid ne ke lalag dan mekeatag te Eleteala ne kenà benar. ²¹Uram ke ve kayi te penurù dan su ruen menge etew ne mibperetiyaya kayi ne iyan dan netemanan ne midsuwey se peretiyaya ran ki Hisu Kristu.

Iyan ku kiyug ne egkeheram nu ke tavang te Eleteala.

Arà dà taman.

Pablo